

Baez Banhoih Daegbied Ndeu

一次特别的班会

□ Cinz Lisinh / 覃丽新

Singhiz ngeih banhaet, gou daj 4 laeuz hai hoih dauqma, ngamq byaij haeuj bangunhsiz, couh raen lauxsae suyoaz hozgaek ngaungau dwk gaen-laeng gou byaij haeujdaej.

De byaij daengz dangnaj gou, doq cuengq gobwnj gwnz fwngz doq hujhuhu gangj: “Ngoenzneix mbouj rox gyoengq lwgnyez ban mwngz baenzlawz lo, ngamq haet gyausiz couh baenzneix uq, mbouj miz da yawj. Aen bwzbanj sij rim cih mbouj mad seuq, gwnznamh lij dauqcawq miz vengqceij、naengmak caeuq daehsuliuh…… Nanzdauh mwngz mbouj anbaiz hagseng baet?”

Dingqnyi de baenzneix gangj, gou doeksat caez, ciepdwk couh iet fwngz bongxbongx mbaq de couh byaij bae coh gyausiz lo. Gou ngamq byaij daengz bakdou gyausiz, couh raen aen daehsuliuh he hau cingq daj ndaw gyausiz daj gwnznamh menhmenh mbin okdaej. Gaiq nyangjbaet hoengz he gaenh raek le, cingq unqnemnem “ninz” youq henz gyangjdaiz.

Raen gou byaij haeujdaej, aen gyausiz ngamq lumj raemxgoenj bauq-myangmyang nei sikhaek caemdingh roengzdaej, caem ndaej dingqnyi gij sing diemheiq gyoengq hagseng. Gou

ndwn youq gwnz gyangjdaiz, lij cing-cuj muengh raen baihlaeng gyausiz “ninz” miz song sam gaiq nyangjbaet. Gou haenqrengz nyaenx dwk mbouj hawj swheiq fatheiq, gungj hwet iet fwngz gip gij nyangjbaet “ninz” hwnjdaej, baet gij nyapnyaj gwnz-namh. Vih mbouj yingyangj dangz goq baihlaeng, gou sing daemq heuh hagseng caez doenghfwngz, gag gip gij nyapnyaj henz daizaw swheiq, gip hwnjdaej vit haeuj aen’ gyangj cienmonz cang nyapnyaj, ciepdwk hwnjdangz.

Banningz gvaq dangz daih’ it dwg hai banhoih. Gou fwngz gaem gij nyangjbaet banhaet “ninz” youq gwnz-namh byaij hwnj gyangjdaiz. Gyoengq hagseng naengh baihlaj miz boux iet hoz daengx da geizgaiq dwk yawj coh gou, miz boux coh doengzhag henz ndang sing saeq gangjsebseb. Gou ndwn dingh le, couh yaengx hwnj gij nyangjbaet yiemzsuk dwk naeuz: “Gyoengq doengzhag, dangz banhoih neix raeuz daej daujlun gij nyangjbaet

neix. Sou dingq lauxsae lawh nyangj-baet gangj geij coenz vah gonq.” Gyoengq hagseng mbouj rox gou yaek gangj maz, cungj nyinhcaen dingq.

Gou siengsim dwk gangj: “Gou dwg boux cwngzyenz aen cizdij ndaw ban, vih hawj gyoengq doengzhag ndaej youq aen gyausiz seuqcingh caemhcai caezcingi daej hagsib, gou moix ngoenz mbouj lau uq mbouj lau naet, baet gyausiz ndaej mbouj miz saekdi faenx. Hai! Mboujliuh aen ndang gou deng dik, in ndaej seizneix ndok daengx ndang lumj yaek sanq, di hong he cungj guh mbouj ndaej. Cij hawj aen gyausiz bienq ndaej baenzneix uq, gou doiq mbouj hwnj caezgya……” Gangj sat, gou lij cang daejnyenye hwnjdaej.

Gou gangj vah seiz, couh yawj-raen mizmbangj hagseng youq laj naengh mbouj onj lo. Miz boux hagseng doeng muengh sae yawj, cienq bae cienq dauq. Gvaq mbouj geijlai nanz, couh raen Gyangh Sinhewng、Liz Veih、Cinz Linzdauh

naj hoengzfetfet menhmenh ndwn hwnjdaej, byaijsupsup hwnj gyangj-daiz daej, youq dangnaj doengzhag daengx ban daj goek daengz byai gangj gij saeh ngoenzlwenz loengh nyangjbaet okdaej.

Raen gyoengqde nyinhloek ndaej mizsim mizeiq, gou vah unq hoz raez dwk doiq hagseng daengx ban naeuz: “Ndiepgvaez gij doxgaiq goenggya dwg gij cwzyin moix boux vunz raeuz, raeuz aeu daj gij saeh iq guh hwnj caemhcai guh ndei. Gij nyangjbaet deng raek deng vaih, raeuz rox bae haw cawx moq daej vuenh. Hoeng, danghnaeuz gij binjdaz cei gihbwnj raeuz guh vunz doek, couh nanz ra ndaej dauq lo. Caemhcai, nyangjbaet deng vaih, doengzhag wnggai gibseiz caeuq gou gangj, lauxsae cij rox doq bae cawx gij moq daej guh veiswng, mboujnex gyausiz uq luenh lai, hawj vunz simcingz mbouj ndei hix goj rox doiq gij ndang caezgya miz vaihcawq. Gij saeh neix gvaqbae couh suenq lo, daj seizneix hwnj, lauxsae muengh daihgaya itheij daej gyaenz aen gyausiz raeuz.”

Hagseng daengx ban dingq gij vah gou gangj cungj bekfwngz hwnjdaej.

Duzmeuz Dingjranz

屋顶上的猫

□ Luz Sicuh Luz Fwncangz / 陆世初 卢奋长

Mbwn’ gvengq ndit raeuj, rumz baet fajnaj daej. Gou daej gwnz dingjranz yawj saw, sam duz meuz ndaw ranz hix laeglemx riengz laeng gou daej. Gou naengh yawj saw, gyoengqde byaij gvaqdaej naengh youq henz ndang gou, iet gij linx ndingmaeq okdaej rizriz bwn, aeu heuj coengh duzdohi gaeb duzmaet roxnaeuz gau humz, doxndiep raix-caix! Dingzlai duzmeuz dak ndit seiz cungj gyaenz baenzneix guh. Roi bwn ndei le, gyoengqde duz ing duz ninz roengzdaej, gij yienghceij gikgyak-gyak caeuq gij ndit banningz doxhab dangqmaz. Gyoengqde yaep ndeu baenqndang, ndaw hoz lij miz gij sing iq “gulu gulu” dem.

Sam duz meuz neix baengh goetgangq meh gyoengqde hawj, maj ndaej maengh raeuh. Gyoengqde yienznaeuz gyaundeih hoeng gig gik, baenzngoenz ninz youq gwnz cauq. Ndawde miz duz meuzmong ndeu maeuzgwn dangqmaz, lij gyaenz caeg doxgaiq, ciengzseiz caeg gwn noh gwnz congz baij, mbouj miz yienghceij duzmeuz saekdi, duzmeuz wnggai gaeb duznou cij deng, hoeng de lumj mbouj yinx gaeb duznou nei. Boh hozndat duz meuz neix caeg gwn noh gwnz congz. Hoeng, de baez caeg gwn noh deng raen le, couh diuqyakyak buetdeuz, buet haeuj gox laep roxnaeuz riengjvaij ndoj haeuj

lajcong z bae, byawz hix moeb mbouj ndaej de. Caj boh hozroengz, de youh menhmenh ndot okdaej, caeuq song duz meuz wnq caemh gwn noh. Gyoengqde rox bouxcaj, ndigah hag rox gvaigvetgvet ndoj deuz, mbouj deng bouxcaj moeb.

Duz meuzndaem ndang hung gvaq duz meuzmong, ndang maengh noh maenh, hoeng beij duz meuzmong dingqgangj. De daengx ndang cungj ndaemndutndut, lwgbaed ndongq gvaq duzmeuz wnq. Miz baez he, de ndwn-ngoengngoeg youq gizlaep heuh gou, gou riengz sing bae ra, gig nanz cij ra ndaej de. Gou naemj, gyanghaemh de bae gaeb duznou seiz, youq gizlaep duznou haengjdingh yawj mbouj raen de, baenzneix de gaeb duznou gig ngaih. Daengx ranz vunz cungj gyaenz duz meuz neix, aenvih de soqlaiz mbouj caeg doxgaiq gwn gvaq. Caemhcai duz meuzmong faen gij noh caeg ndaej seiz, de hix mbouj gwn saek gaemz, cij youq gizgyae ngonz.

Duz meuzndaem gaeb duznou ak raixcaix, duznou de gaeb ndaej lai gvaq song duz meuz wnq. De mbouj ngah ninz youq gwnz cauq geijlai, ciengzseiz youq henz canghaeux cunz bae cunz dauq, lumj bouxbing dawz dieg youqgaenj. Moix gek geij ngoenz, de cungj gaeb ndaej duz nou ndeu. Baeznaengz, de youq gizlaep gaeb ndaej duznou le, couh gamz duznou



Va byaekyouzcai q henjrwgrw hai langh dinbya.

Cinz Binh ingj

youq ndaw bak, byaijndiengndieng daengz giz bouxcaj yawj ndaej raen, caiq menhmenh gwn duznou. De rox yienh goenglauz coh bouxcaj, dwg-gyaenz raixcaix.

Meuzmeh mizndang moq lo. Gij yienghceij de gig geizheih, dungx lai ok geij gaiq noh, meuzlwg ndaw dungx de doed okdaej. Hoeng, duz meuz-meh neix lij caeuq gaxgonq doxdoengz diuq hwnj diuq roengz, de lij gyaenz caeuq song duz meuz wnq doxmoeb doxnyex guhcaemz. Gou lij raen de daj gwnz liengz sanggvanggyang yat roengzdaej, doek youq gwnz daengq onjdudup. De lumj mbouj lau lwg ndaw dungx deng sieng. Goulau duzmeuz daj okseng couh maij yat maij diuq.

Duz roeglaj iqetet he mbin gvaqdaej, douh youq gwnz batva. De riengjretret youq ndaw byozfaex ndonj bae ndonj dauq. Gij ciuz “cici caca” de cauz ndaej duzmeuz ninzndaek ndiu lo. Duz meuzmong ndwn hwnjdaej gonq, de haeujsim dwk yawj-myoeqmyoeq, byaijyummyum coh batva. Duz meuzndaem caeuq duz meuzmeh ninz youq mbouj ning, byaengq da yawj duz meuzmong. Duz meuzmong caengz byaij daengz batva, roeglaj couh mbinfokfok deuz lo. De daengj-rieng ngiengxgyaeuj cim duz roeglaj mbin bae, miz di fouznaih caemhcai hozbongz. Duz meuzmeh swenj baez ndeu, de cij ngaemgyaeuj byaij doxdaeq, youh laebdaeb laep da ninz youq gwnznamh raeujrubrub.